



*Ang Mensahero  
William Marrion Branham*

# Ang Mensahero

## Sa

### Kapanahunan Sa Iglesia

### Sa Laodicea

Pinadayag 3:14-22

Ug ngadto sa manolunda sa iglesia sa Laodicea isulat mo kini: Kining mga butang ang ginaingon sa Amen, ang Kasaligan ug Tinuod nga Saksi, ang sinugdan sa mga Binuhat sa Dios;

Naila Ko ang imong mga buhat, nga ikaw dili mabugnaw ug dili usab mainit: Buot Ko nga mabugnaw ka unta o mainit man.

Busa kay ikaw dagaang man, ug dili mabugnaw ug dili usab mainit, isuka Ko ikaw sa Akong baba.

Kay nagaingon ka, dato man ako, ug nakabaton ug mga bahandi, ug wala magkinahanglan sa bisan unsa; ug wala ka nakahibalo nga ikaw mao'y talamayon, ug makalolooy, ug kabus, ug buta, ug hubo:

Nagatambag Ako kanimo nga magpalit ka gikan Kanako ug bulawan nga inulay sa kalayo, aron madato ka; ug maputing mga bisti, aron imong ikasul-ob, ug aron ang kaulawan sa imong pagkahubo dili mahipadayag; ug tambal nga idihog mo sa imong mga mata, aron makakita ka.

Ginabadlong Ko ug ginapanton, ang kapid-an nga Akong gihigugma: busa magmadasigon ka, ug maghinulsul.

Ania karon, nagatindog Ako sa pultahan, ug nagatuktok: kung kinsa man ang magapatalinghug sa Akong tingog, ug moabli sa pultahan, Ako mosulod kaniya, ug manihapon Ako uban kaniya, ug siya uban Kanako.

Ang magamadaugon pagatugutan Ko nga magalingkod uban Kanako sa Akong trono, maingon nga Ako usab nagmadaugon, ug milingkod Ako uban sa Akong Amahan sa Iyang trono.

Kadtong may igdulugog, magpatalinghug sa ginaingon sa Espiritu ngadto sa mga iglesia.

# Ang Mensahero

Nagaduhaduha gyud ako kung naila ba gayud sa bisan unsa mang panahon ang mensahero sa Dios nga gipadala alang niini, gawas sa nahaunang panahon diin si Pablo mao ang mensahero. Ug bisan pa gani sa nianang panahona daghan ang wala nakaila kaniya kung unsa siya.

Karon ang panahon nga atong gikinabuhian mahimong hamubo lang gayud kaayo. Ang mga panghitabo magakahitabo sa madali kaayo. Busa ang mensahero alang niining Panahon sa Laodicea gikinahanglan nga ania na karon, bisan tingali nga wala pa kita nakaila kaniya. Apan siguradong magkaaduna gayu'y panahon nga siya maila. Karon akong mapamatud-an kana tungod kay aduna kita'y Kasulatan nga nagahulagway sa iyang ministerio.

Una sa tanan, kana nga mensahero mamahimong usa ka propeta. Magkaaduna siya'y opisina sa pagkapropeta. Magkaaduna siya'y pang-propeta nga ministerio. Malig-on gayud nga igabasi kini sa Pulong tungod kay sa dihang nagapropesiya siya o kaha adunay panan-awon, kanunay gayud kini "pinasubay sa Pulong" ug KANUNAY kini nga matuman. Pagapamatud-an siya ingon nga usa ka propeta tungod sa iyang pagkatukma gayud. Ang pamatuod nga usa siya ka propeta makita diha sa Pinadayag 10:7, "Apan sa mga adlaw sa tingog sa ikapitong manolunda sa diha nga siya buot magbudyong, niya ang tinago sa Dios matuman na sumala sa mga maayong balita nga gimantala niya sa Iyang mga ulipan, nga mao ang mga propeta." Karon kining tawhana, nga niining bersikulo gitawag nga usa ka "manolunda" diha sa King James nga ang hubad DILI usa ka langitnong binuhat. Ang ikaunom nga nagahuyop sa trumpeta nga manulonda, nga usa ka langitnong binuhat, maoy anaa sa Pinadayag 9:13, ug ang ikapito nga sa mao gihapong matang anaa sa Pinadayag 11:15. Kining usa dinhi sa Pinadayag 10:7 mao ang mensahero sa ikapitong panahon ug usa kini ka tawo, ug siya magadala sa mensahe gikan sa Dios, ug ang iyang mensahe ug ministerio mao ang magatuman sa tinago sa Dios, sumala sa gipahibalo ngadto sa Iyang mga ulipan, ang mga propeta. Pagailhon sa Dios kining katapusang mensahero ingon nga usa ka propeta TUNGOD KAY SIYA USA KA PROPETA. Mao kana kon unsa kaniadto si Pablo sa nahaunang panahon, ug ang katapusang panahon adunay usa, usab. Amos 3:6-7, "Sulod sa ciudad ang trumpeta patingogon ba alang sa gubat, ug ang katawhan dili diay mahadlok? mahulog ba lamang ang kadautan sa usa ka ciudad, ug kini sa dili pagbuot sa GINOO? Sa pagkamatuod ang Ginoong Dios dili magbuhat sa bisan unsa, gawas kung ang Iyang tinago ipadayag Niya sa Iyang mga alagad, ang mga propeta."

Sa katapusang panahon na kini nga miabot ang pito ka mga dalugdog ni Jesus. Pinadayag 10:3-4, "Ug misinggit siya sa makusog nga tingog, maingon sa leon nga nagangulob: ug sa pagsinggit niya, mitingog ang pito ka mga dalugdog. Ug sa nakatingog na ang pito ka mga dalugdog, isulat ko na unta kini: Ug akong hingdunggan ang usa ka tingog gikan sa langit nga nagaingon kanako, Iilong ang gisulti sa pito ka mga dalugdog, ug ayaw kini isulat." Unsa man ang anaa sa mga dalugdog walay usa nga nahibalo. Apan gikinahanglan nato nga mahibaloan. Ug gikinahanglan niini ang usa ka propeta aron makuha ang pinadayag tungod kay wala nay laing paagi ang Dios sa pagbutyag sa Iyang mga pinadayag sa Kasulatan gawas lamang sa usa ka propeta. Ang Pulong kanunay nagaabot sa propeta ug sa kanunay gayud ingon-ana. Nga mao kini sa dayag ang balaod sa Dios bisan sa

ordinaryong pagsusi sa Kasulatan. Ang Dios nga walay pagkabalhin uban sa iyang walay pagbalhin nga mga pamaagi ug sa walay pagbalhin nagpadala sa Iyang propeta sa matag panahon diin ang mga tawo nahisalaag na gikan sa Balaang sugo. Sa hinungdan nga pareho na ang mga teologo ug ang mga tawo nagpahilayo na gikan sa Pulong, kanunay ang Dios nagpadala sa Iyang alagad ngadto niining mga tawo (apan linain gikan sa mga teologo) aron pagatul-iron ang mga mini nga pagtulon-an ug ipabalik ang mga tawo ngadto sa Dios.

Busa atong makita ang usa ka mensahero sa ikapitong kapanahunan nga nagaabot, ug siya usa ka propeta.

Dili lamang nga atong makita kining mensahero dinhi sa Pinadayag 10:7 nga nagaabot, kondili atong makaplagan nga ang Pulong nagahisgot sa pag-anhi ni Elias sa dili pa ang pagbalik ni Jesus. Sa Mateo 17:10, “Ug gipangutana Siya sa Iyang mga tinun-an, nga nanag-ingon, Nan nganong magaingon man ang mga escriba nga si Elias kinahanglan kono mouna usa sa pag-anhi?” Ug mitubag si Jesus, “Tinuod nga si Elias kinahanglan magaanhi, ug igapasiuli niya ang tanang mga butang.” Sa dili pa ang pagbalik sa atong Ginoo, kinahanglan magabalik si Elias alang sa bulohaton nga pagpasig-uli diha sa iglesia. Mao kini ang ginasulti sa Malaquias 4:5, “Ania karon akong ipadala kaninyo si Elias ang propeta sa dili pa moabot ang daku ug makalilisang nga adlaw sa Ginoo: ug iyang pabalikon ang kasingkasing sa mga amahan ngadto sa mga bata, ug ang kasingkasing sa mga bata ngadto sa ilang mga amahan, tingali unya ako moanhi ug samaran ko ang yuta pinaagi sa usa ka panghimaraut.” Siguradong wala gayu’y pagduhaduha nga si Elias kinahanglan mobalik sa dili pa ang pag-anhi ni Jesus. Aduna siya’y pihong bulohaton nga pagatumanon. Kana nga bulohaton maoy kabahin sa Malaquias 4:6 nga nagaingon “iyang pabalikon ang kasingkasing sa mga bata ngadto sa ilang mga amahan.” Ang hinungdan nga ato nahibaloan nga kini ang pihong bulohaton nga iyang pagabuhaton nianang panahona tungod kay natuman na niya ang maong bahin nga nagaingon “iyang pabalikon ang kasingkasing sa mga amahan ngadto sa mga bata,” sa diha nga ang Elias nga ministerio ania pa kaniadto kang Juan Bautista. Lucas 1:17, “ug siya magauna Kaniya diha sa Espiritu ug sa gahum ni Elias, aron sa pagpabalik sa mga kasingkasing sa mga amahan ngadto sa mga anak, ug sa mga masupilon ngadto sa kaalam sa mga Matarung, aron sa pagtagana alang sa Ginoo usa ka katawhan nga inandam.” Diha sa ministerio ni Juan “ang mga kasingkasing sa mga amahan nahipasig-uli na ngadto sa mga bata.” Nasayod kita niana tungod kay ingon-ana man ang gisulti ni Jesus. Apan wala kini nagahisgot nga ang mga kasingkasing sa mga bata nahipasig-uli na ngadto sa mga amahan. Kana magakahitabo pa lang. Ang kasingkasing sa mga bata sa katapusang mga adlaw igapasig-uli ngadto sa mga Pentecostal nga amahan. Nahimo ni Juan ang pagpaandam sa mga amahan ngadto kang Jesus sa pagdawat sa mga anak ngadto sa maong toril. Karon kining maong propeta nga diin nagakunsad ang Espiritu ni Elias mao ang magaandam sa mga anak aron sa pagsugat kang Jesus.

Gitawag ni Jesus si Juan Bautista, nga Elias. Mateo 17:12, “Apan ginasulti ko kaninyo nga si Elias nahianhi na, ug wala sila makaila kaniya, apan ila nang gibuhat kaniya ang gusto nilang buhaton.” Ang hinungdan kon ngano nga gitawag niya si Juan nga Elias, tungod kay ang mao rang Espiritu nga atua kang Elias mibalik diha kang Juan, mao man sa gihapon nga kanang maong Espiritu mibalik diha kang Eliseo human sa paghari ni Haring Ahab. Karon kana nga Espiritu sa makausa pa magakunsad pag-usab diha sa usa ka tawo sa dili pa ang pagbalik ni Jesus. Mamahimo siyang usa ka propeta. Pagapamatud-an gayud siya sa Dios ingon nga propeta. Tungod kay si Jesus, Mismo, diha sa pagkaunod dili maania dinhi aron pamatud-an siya, (sama sa gibuhat Niya kang Juan) pagabuhaton kini pinaagi sa Espiritu Santo aron nga

ang ministerio niining maong propeta pagaubanan sa daku ug katingalahang mga pagpadayag. Ingon nga usa ka propeta, panghimatud-an ang matag pagpahayag, tungod kay ang maong matag pagpahayag magakahitabo. Ang katingalahang mga buhat sa gahum pagabuhatan sa iyang mga pagmando diha sa pagtoo. Dayon igapahayag ang maong mensahe nga gikahatag kaniya sa Dios diha sa Pulong aron pabalikon ang mga tawo ngadto sa kamatuoran ug sa matuod nga gahum sa Dios. Ang uban magapatalinghug, apan ang kadaghanan magapahilayo sama sa naandan na ug igasalikway siya.

Kay kining propetang mensahero sa Pinadayag 10:7 ang mao ra sa gihapon sa Malaquias 4:5-6 siya sa natural mamahimong sama kang Elias ug Juan. Silang duruha kaniadto maoy mga tawong linain gikan sa giilang mga pang-relihiyoso nga mga tulunggaan sa ilang adlaw. Pareho silang mga lalaki sa kamingawan. Parehong nagpamuhat lamang sa dihang anaa na kanila ang “Mao kini ang ginaingon sa Ginoo,” nga deretso gikan sa Dios pinaagi sa pinadayag. Parehong nagsaway sa relihiyosong mga orden ug mga tigpangulo sa ilang panahon. Apan dili lamang ingon-ana, gipangsaway nila ang tanang dautan o himoong dautan ang uban pa. Ug himatikdi, pareho gayud silang nanggipropesiya batok sa mga babayeng imoral ug sa ilang mga gawi. Nangsway si Elias batok kang Jezebel, ug gibadlong ni Juan si Herodias, ang asawa ni Felipe.

Bisan pa nga dili siya mamahimong inila gayud, panghimatud-an siya sa Dios. Maingon nga gipamatud-an ni Jesus si Juan, ug gipamatud-an sa Espiritu Santo si Jesus, atong malauman gyud nga una sa tanan kining tawhana pagapamatud-an pinaagi sa Espiritu nga nagalihok sa iyang kinabuhi sa mga buhat sa gahum nga dili kaduhaduhaan ug nga dili makita bisag asa pa man; ug si Jesus Mismo, sa Iyang pagbalik, pagapamatud-an siya, maingon nga Iyang gipamatud-an si Juan. Si Juan nagpahayag nga paanhi na si Jesus, —ug mao man usab kining tawhana, sama ni Juan, nagapahayag nga paanhi na si Jesus. Ug ang pagbalik mismo ni Cristo mao’y magapamatud nga kining tawhana sigurado gayud mao ang mag-uuna sa Iyang ikaduhang pagbalik. Mao kini ang katapusang kalig-onan nga kini gayud mao ang propeta sa Malaquias 4, kay ang katapusan sa kapanahunan sa Gentil mao man si Jesus, Siya Mismo, nga nagapakita. Dayon mahimong ulahi na gayud kaayo alang niadtong mga nagsalikway kaniya.

Aron mahatagan pa’g katin-awan ang atong pagpaila niining maong propeta sa katapusang-panahon, ato gyud timan-an nga ang propeta sa Mateo 11:12, mao si Juan Bautista, kinsa mao ang gitagna sa Malaquias 3:1, “Ania karon, Ako nagapadala sa Akong sinugo, ug siya magandam sa dalan sa atubangan Ko; ug ang Ginoo, nga inyong ginapangita, moabut sa hinanali sa Iyang templo, bisan ang Sinugo sa tugon, si Kinsa inyong gitinguha; ania karon, Siya moabut na, nagaingon ang Ginoo sa mga Panon.” Mateo 11:1-12, “Ug sa nahitabo, nga sa pagkahuman ni Jesus paghatag sa mga sugo sa iyang napulo ug duha ka mga tinun-an, Siya milakaw gikan didto aron sa pagpanudlo ug pagwali sa mga lungsod nila. Karon sa pagkadungog ni Juan didto sa bilanggoan sa mga buhat ni Cristo, iyang gipaadto ang duha niya ka mga tinun-an, ug sa pagpangutana Kaniya, Ikaw ba Kadtong moanhi, o magapaabot pa ba kami ug lain? Mitubag si Jesus ug miingon kanila, Pangadto kamo ug suginlan ninyo si Juan sa mga butang nga inyong hingdunggan ug hingkit-an: ang mga buta nanagpakakita, ug ang mga bakul nanagpakalakaw, ang mga sanlahon nangahinloan, ug ang mga bungol nakadungog na, ang mga minatay nangabanhaw, ug gikawalihan ang mga kabus sa Maayong Balita. Ug bulahan kadto, ang dili makakaplag Kanako ug kahigayonan sa pagkapangdol. Ug sa paglakaw na nila, misugod si Jesus sa pag-ingon sa katawhan mahitungod kang Juan, Unsa bay inyong giadto aron tan-awon didto sa kamingawan? Usa ba ka bagakay nga ginahapayhapay

sa hangin? Apan unsa man ang giadto ninyo sa pagtan-aw? Usa ba ka tawo nga nagasul-ob ug mga panapton nga hamili? Ania karon, ang managsul-ob ug mga panapton nga hamili anaa sa mga balay sa mga hari. Apan unsa ang giadto ninyo sa pagtan-aw? Usa ba ka propeta? Oo, nagaingon ako kaninyo, ug labaw pa kay sa propeta. Kay kini mao siya, ang hingtungdan sa nahisulat. Ania karon, Akong ginasugo ang Akong sinugo nga magauna Kanimo, nga magaandam sa Imong dalan sa atubangan Mo. Sa pagkamatuod nagaingon Ako kaninyo, Nga sa mga nangatawo sa mga babaye wala pay nahitungha nga labaw pa kang Juan nga Bautista: ngani ang labing gamay sa gingharian sa langit daku pa kay kaniya.” Kini nahitabo na. Nahitabo na kini. Natapos na kini. Apan himatikdi karon dinhi sa Malaquias 4:1-6, “Kay ania karon, ang adlaw moabut na, nga nagasunog daw hudno; ug ang tanang mga palabilabihon, oo, ug ang tanang nanagbuhat sa kadautan, mangahimong tuod sa balili; ug ang adlaw nga moabut magasunog kanila, nagaingon ang Ginoo sa mga panon, nga kini dili magbilin kanila bisan gamut ni sanga. Apan kaninyo nga may kahadlok sa Akong Ngalan ang Adlaw sa Pagkamatarung mosubang nga adunay kaluwasan sa Iyang mga pako; ug kamo manggula, ug managlumpat sa kalipay maingon sa mga nating vaca sa toril. Ug pagatamakan ninyo ang mga dautan; kay sila mangahimong abo sa ilalum sa mga lapa-lapa sa inyong mga tiil sa adlaw nga akong pagahimoon kini, nagaingon ang Ginoo sa mga panon. Hinumdumi ninyo ang kasugoan ni Moises nga Akong alagad, nga Akong gisugo kaniya didto sa Horeb alang sa tibuok nga Israel, bisan ang kabalaoran ug ang mga tulomanon. Ania karon, akong ipadala kaninyo si Elias ang propeta sa dili pa moabot ang daku ug makalilisang nga adlaw sa Ginoo: ug iyang pabalikang ang kasingkasing sa mga amahan ngadto sa mga bata, ug ang kasingkasing sa mga bata ngadto sa ilang mga amahan, tingali unya Ako moanhi ug samaran Ko ang yuta pinaagi sa usa ka panghimaraut.” Kita n’yo, dihadiha human sa pag-abot NIINING maong Elias, ang yuta pagahinloan pinaagi sa kalayo ug ang mga dautan pagasunogon hangtud mangahimong abo. Siyempre, WALA kini mahitabo sa kapanahunan ni Juan (ang Elias sa iyang adlaw). Ang Espiritu sa Dios nga nagpropesiya sa pag-abot sa mensahero sa Malaquias 3:1 (nga si Juan) nagasulti lamang ug utro sa Iyang nahiunang mga pang-propesiyang pahayag sa Isaia 40:3 nga naipahayag na sa dili mominos sa tulo ka gatusan na ka mga katuingang nangagi. “Ang tingog sa usa nga nagasinggit sa kamingawan. Andama ninyo ang dalan sa Ginoo, himoang patag ang usa ka halapad nga dalan alang sa atong Dios.” Karon si Juan, pinaagi sa Espiritu Santo, parehong gipatingog sila Isaia ug Malaquias sa Mateo 3:3, “Kay kini mao siya ang gihisgutan sa propeta nga si Isaia, nga nagaingon, ang tingog nga nagasinggit sa kamingawan, Andama ninyo ang dalan alang sa Ginoo, tul-ira ninyo ang Iyang mga agianan.” Busa ato gayud klarong makita gikan niining mga Kasulatan nga ang propeta sa Malaquias 3, nga mao si Juan, DILI ang maong propeta sa Malaquias 4, bisan pa sa pagkatinuod, *parehong si Juan ug kining katapusang-adlaw nga propeta adunay managsamang Espiritu nga atua kanhi kang Elias.*

Karon kining maong mensahero sa Malaquias 4 ug Pinadayag 10:7 magabuhag ug duha ka butang. Una: Sumala sa Malaquias 4 iyang pabalikang ang kasingkasing sa mga bata ngadto sa mga amahan. Ikaduha: Iyang igapadayag ang mga tinago sa pito ka mga dalugdug diha sa Pinadayag 10 nga mao ang mga pinadayag nga anaa sa sulod sa pito ka mga selyo. Kining gipadayag gikan sa Langit nga “tinagong-mga-kamatuoran” nga sa literal mao’y magapabalik sa kasingkasing sa mga bata ngadto sa mga Pentecostal nga mga amahan. Ensaktong ingon-ana gayud.

Apan pamalandunga pud kini. Kining mensahero-nga-propeta sa iyang kinaiyahan ug pamatasan mamahimong sama kaniadto kang Elias ug Juan.

Ang mga tawo sa panahon niining mensahero-nga-propeta mamahimong mao man usab sa mga adlaw ni Ahab, ug ni Juan. Ug kay kini “ALANG LAMANG SA MAONG MGA BATA” nga kinsang mga kasingkasing pagapabalikon, ang mga bata lang gayud ang magapatalinghug niini. Sa mga adlaw ni Ahab adunay 7,000 lamang ang nahikaplagan nga mga matuod nga binhing Israelinhon. Sa mga adlaw ni Juan diyutay lang pud kaayo. Ang mga tawo niadtong duha ka mga panahon atua sa pagpakighilawas sa pagsimba’g mga diosdiosan.

Buot kong mohimo ug usa pa ka pagtandi tali sa maong mensahero-nga-propeta sa Laodicea ug kang Juan, nga mao ang mensahero-nga-propeta nga nag-una sa nahaunang pag-anhi ni Jesus. Ang mga tawo niadtong panahon ni Juan naalaan siyang ingon nga Mesias. Juan 1:19-20, “Ug mao kini ang pagpamatuod ni Juan, sa diha nga gipadala sa mga Judio ang mga sacerdote ug mga Levita gikan sa Jerusalem aron sa pagpangutana kaniya, Kinsa ba ikaw? Ug siya mitug-an, ug wala maglimod; apun mitug-an, ako dili mao ang Cristo.” Karon kining mensahero-nga-propeta sa katapusang mga adlaw magkaaduna ug ingon nga gahum sa atubangan sa Ginoo mao nga aduna kadtong maalaan siyang si Ginoong Jesus. (Magkaadunay espiritu sa kalibutan sa katapusang panahon nga magapahisalaag sa uban ug ipatoo sila niini. Mateo 24:23-26, “Kay motungha ang mga mini nga Cristo, ug mga mini nga propeta, ug magapakita’g dagkung mga ilhanan ug mga katingalahan; sa ingon nga, kon mahimo pa, ipahisalaag nila bisan pa ang mga pinili. Tan-awa, gisuginlan ko na kamong daan. Busa kon sila magaingon kaninyo, Tan-awa, atua siya sa kamingawan; ayaw gyud kamo pag-adtog; tan-awa, anaa siya sa sulod nga mga lawak; ayaw kamo pagtoo niini.”) Apan ayaw gyud ninyo kini toohi. Siya dili mao si Jesus Cristo. Dili siya mao ang Anak sa Dios. SIYA USA SA MGA KAIGSOONAN, USA KA PROPETA, USA KA MENSAHERO, USA KA SULUGOON SA DIOS. Wala siya nagakinahanglan ug labaw pa sa gihatag kaniya nga kadunggan kay sa nadawat ni Juan sa dihang siya ang maong tingog nga nagsinggit, “Ako dili mao Siya, APAN NAGAABOT SIYA SUNOD KANAKO.”

Sa dili pa nato tapuson kining bahin mahitungod sa mensahero sa Kapanahunan sa Laodicea, atong kinahanglan pamalandungan ug ayo kining duha ka mga panghunahuna. Una, kini nga kapanahunan adunay USA ka Mensahero-nga-Propeta. Pinadayag 10:7, nagaingon, “Sa diha nga siya (usa ra) buot magbudyong.” Wala pa gayu’y panahon sukad nga nahitabong mihatag ang Dios ngadto sa Iyang katawhan ug duha ka medyor nga propeta sa usa ka higayon. Iyang gihatag si Enoch (nga nag-inusara); Iyang gihatag si Noe (nga nag-inusara); Iyang gihatag si Moises (siya lamang kaniadto ang anaay Pulong bisan tuod ang uban nagpanagna); Miabot si Juan Bautista nga NAG-INUSARA. Karon sa niining katapusang panahon magkaadunay usa ka PROPETA (dili usa ka babayeng propeta—bisan pa nga niining maong panahon mas daghan nang kababayan-an nagapangangkon sa pagpahayag ug pinadayag sa Dios kay sa mga kalalaken-an), ug ang dili-masayup nga Pulong nagaingon nga siya (ang maong propeta) magapahayag sa mga tinago ngadto sa maong mga katawhan sa katapusang-panahon, ug pabalikon ang mga kasingkasing sa mga bata ngadto sa mga amahan. Adunay kadtong mga nagaingon nga ang mga tawo sa Dios magakahiusa pinaagi sa usa ka *tingug nga pinadayag*. Ginahagit ko kanang maong pahayag. Usa kini ka klarong, walay kapuslanang pagpakaingon diha sa atubangan sa Pinadayag 10:7. Karon dili ko ikalimod nga ang mga tawo magapangpropesiya niining katapusang kapanahunan ug ang ilang mga ministerio makahimo ug mamahimong husto. Dili ko ikalimod nga magkaadunay mga propeta bisan pa kaniadto sa mga adlaw ni Pablo nga diin adunay “usa ka Agabus nga usa ka propetang nagpropesiya mahitungod sa usa ka dakung kagutom.” Nagauyon ako nga ingon niana kana. APAN GINAPANGHIMAKAK KO BASI SA DILI-MASAYUP NGA KALIG-ONAN

SA PULONG NGA ADUNAY LABAW PA SA USA KA MEDYOR NGA MENSAHERO-NGA-PROPETA NGA MAGAPAHAYAG SA MAONG MGA TINAGO NGA ANAA SA PULONG, UG NGA ADUNAY MINISTERIO SA PAGPASIG-ULI SA KASINGKASING SA MGA BATA NGADTO SA MGA AMAHAN. “Mao kini ang ginaingon sa Ginoo” nagapatigbabaw pinaagi sa wala-nagakapakyas Niyang Pulong, magapatigbabaw ug pagapanghimatud-an. Adunay usa ka mensahero-nga-propeta niining maong kapanahunan. Basi lang mismo sa tawhanong pamatasan, si bisan kinsa man nasayod nga kung diin gani adunay daghang mga tawo aduna usab ang pagkabahinbahin sa panghunahuna bisan diha sa gamay’ng mga puntos mahitungod sa medyor nga doktrina nga ila tanan parehong ginakuptan. Kinsa man kon ingon ana ang magkaadunay gahum sa walay-pagkasayup nga igabalik sa niining katapusang kapanahunan, tungod kay kining katapusang kapanahunan magabalik sa pagpadayag sa Putling Pulong nga Pangasaw-onon? Nagkahulugan kana nga maaduna kanato ang Pulong sa makausa pa maingon nga gikahatag kini sa hingpit kaniadto, ug nga nasabtan ug hingpit sa mga adlaw ni Pablo. Suginlan ko kamo kung kinsa ang magkaaduna niini. Kini mamahimong usa ka propetang ingon gayud ka gipanghimatud-an, ug nga mas gipanghimatud-an pa gani kaysa bisan hain mang propeta sa tanang mga kapanahunan sukad pa kang Enoch hangtud karon niining mga adlaw, tungod kay kining tawhana sa pagkakinahanglanon magkaadunay batong-panaklob nga ministeriong may kalambigitan sa pagka-propeta, ug igapadayag siya sa Dios. Dili na niya kinahanglan mosulti pa alang sa iyang kaugalingon, Dios ang magasulti alang kaniya pinaagi sa maong tingog sa ilhanan. Amen.

Ang ikaduhang panghunahuna nga kinahanglan mapatik diha sa atong mga kasingkasing mao nga ang pito ka mga kapanahunan sa iglesia nagsugod kauban ang espiritu sa anti-cristo ingon man usab ang Balaang Espiritu Kinsa maoy dalaygon hangtud sa kahangturan. I Juan 4:1, “Mga hinigugma, ayaw ninyo pagtoohi ang tanang espiritu, hinonoa susiha ninyo ang mga espiritu sa pagsuta kon sila iya ba sa Dios: kay daghan ang mga mini nga propeta nga nanagpanungha sa kalibutan.” Inyo ba kining namatikdan? Ang espiritu sa anti-cristo mailhan sa mga mini nga propeta. Nanagpanulod ang mga kapanahunan kauban ang mini nga mga propeta ug magapanggawas sila kauban ang mini nga mga propeta. Karon aduna siyempre TINUOD NGA MINI NGA PROPETA diha sa halangdon nga pag-ila mahitungod nianang maong tawo nga gihisgutan diha sa Pinadayag. Apan sa pagkakaran nga wala pa ang pagpadayag kaniya dunay motungha nga mga mini nga propeta. Mateo 24:23-26, “Unya aduna may magaingon kaninyo, Tan-awa, ania si Cristo, o didto man; ayaw pagtoo niini. Kay motungha ang mga mini nga Cristo, ug mga mini nga propeta, ug magapakita’g dagkung mga ilhanan ug mga katingalahan; sa ingon nga, kon mahimo pa, ipahisalaag nila bisan ang mga pinili. Tan-awa, gisuginlan ko na kamong daan. Busa kon sila magaingon kaninyo, Tan-awa, atua siya sa kamingawan; ayaw gyud kamo pag-adt: tan-awa, anaa siya sa sulod nga mga lawak; ayaw kamo pagtoo niini.” Kining mini nga mga propeta gipangtiman-an na alang kanato sa uban pang daghan nga Kasulatan sama niining mga mosunod. II Pedro 2:1-2, “Apan kaniadto may mitungha nga mga mini nga propeta usab sa taliwala sa katawhan, ingon man usab sa inyong taliwala adunay malangdog nga mga mini nga magtutudlo, nga sa tago magpasulod ug malagalagong mga herejia, nga magalimod bisan pa sa Ginoo nga mitubos kanila ug nagadala diha sa ilang kaugalingon hinanali nga pagkalaglag. Ug daghan ang magasunod sa ilang mga buhat sa pagpatuyang sa kaulag; nga tungod kanila pagapasad-an ang dalan sa kamatuoran.” II Timoteo 4:3-4, “Kay moabut ang panahon nga dili na sila molahutay sa maayong pagtulon-an; kondili nga sa may mga dalunggan nga gikatlan, magatigum



sila sa ilang kaugalingon ug mga magtutudlo uyon sa ilang mga kailibgon; Ug igapahilayo nila ang ilang mga dalunggan gikan sa kamatuoran, ug manghisalaag sila ngadto sa mga sugilanon lamang.” I Timoteo 4:1, “Karon ang Espiritu sa tin-aw nagapahayag, nga sa kaulahianga mga panahon adunay uban nga managpamiya gikan sa pagtoo, nga nagapangtagad sa mga malimbongon nga espiritu, ug sa mga pagtulon-an sa mga yawa.” Karon sa matag higayon inyong mamatikdan nga ang usa ka mini nga propeta anaa sa gawas sa Pulong. Mao ra sa gihapon sa among gipakita diha kaninyo nga ang “anti-cristo” nagkahulogan nga “supak sa Pulong” busa kining mini nga mga propeta nagapangabot nga nagapangbalit-ad sa Pulong, ginahatagan kini ug kahulogan nga mosibo sa ilang mga kaugalingong yawan-on nga mga katuyoan. Inyo na bang namatikdan kung giunsa nga ang maong mga tawo nga nagapahisalaag sa uban ginabugkos sila pahaduol mismo kanila pinaagi sa paghadlok? Nagaingon sila nga kung dili buhaton sa mga tawo ang ilang ginaingon, o kung manghawa sila, nan mosunod ang kalaglagan. Mini sila nga mga propeta, kay ang tinuod nga propeta kanunay ginadala ang tawo ngadto sa Pulong ug ginabugkos ang mga tawo ngadto kang Jesus Cristo ug dili siya moingon sa mga tawo nga kahadlokkan siya o kung unsa man ang iyang ginaingon, kondili kahadlokkan kung unsa man ang ginaingon sa Pulong. Himatikdi kung giunsa niining maong mga tawo nga sama kang Judas nag-apas lang sa kwarta. Haylohon ka nilang ibaligya ang tanan nga anaa kanimo ug ihatag kini kanila ug sa ilang mga lingla. Mas hatagan nila ug higayon ang sa mga offering kay sa Pulong. Kanila nga mga nagapaningkamot sa pagpalihok sa mga gasa pagapahimuslan ang usa ka gasang adunay gamay’ng kasayup niini ug dayon mangayo ug salapi, ug dili na panumbalingon ang Pulong ug tawgon kini nga iya sa Dios. Ug mangduol ang mga tawo kanila, ug makigtambayayong kanila, ug suportahan sila, ug toohan sila, nga wala nahibalo nga mao kini ang dalan ngadto sa kamatayon. Oo, ang kayutaan puno na sa karnal nga mga manunundog. Sa katapusang adlaw pagasulayan nilang sundogon kanang maong mensahero-nga-propeta. Gipaningkamotan sa pito ka mga anak nga lalaki ni Sceva sa pagsundog kang Pablo. Si Simon nga salamangkero naningkamot sa pagsundog kang Pedro. Ang ilang mga pagsundog mamahimong karnal. Dili nila mahimong ipadayag kung unsa ang ginapadayag sa tinuod nga propeta. Sa dihang ginaingon niya nga ang rebaybal human na molibot silang nagapamahayag sa usa ka dakung pinadayag nga kung unsa man ang anaa na sa mga tawo mao na gayud ang husto ug nga mobuhat ang Dios sa dagku pa ug mas katingalahan pang mga butang taliwala sa mga katawhan. Ug malimbongan ang mga tawo niini. Kining mao ra gihapon nga mini nga mga propeta magapahayag nga ang maong mensahero sa katapusang adlaw dili man usa ka teologo, busa dili siya angay nga patalinghugan. Dili nila mahimong ipadayag kung unsa ang mahimo sa maong mensahero; dili sila panghimatud-an sa Dios sama sa pagpanghimatuod nianang maong propeta sa ulahing mga adlaw, apan pinaagi sa ilang mga kabatid sa pamulong ug pinaagi sa kabug-at sa ilang pang-tibuok kalibutan nga kabantugan ilang pasidan-an ang mga tawo nga dili sila managpatalinghug nianang tawhana (ang mensahero) ug moingon silang nagapanudlo siya’g sayup. Nagalihok sila nga ensaktong sama gayud sa ilang mga amahan, ang mga Fariseo, nga mga iya sa yawa, tungod kay ila kaniadtong gipahayag nga parehong si Juan ug si Jesus nanapanudlo ug sayup.

Karon ngano man nga kining mini nga mga propeta ginabatokan ang maong tinuod nga propeta ug ginapanghimakak ang iyang pagpanudlo? Tungod kay nagasunod lang gayud sila sa maong tinuod nga kinaiya sama sa gibuhad sa ilang unang mga amahan nga diha sa mga adlaw ni Ahab ningsupak sila kang Miquias. Adunay upat ka gatus kanila *ug silang tanan*

*nanagkauyon; ug pinaagi kanilang tanan nga managsamang nagasulti ug mao rang butang, ilang giilad ang mga tawo.* Apan USA ka propeta—*usa lang gayud*—ang mao'y husto ug ang tanang uban sayup tungod kay gikatugyan sa Dios ang Pinadayag ngadto sa USA LAMANG.

Magbantay sa mini nga mga propeta, tungod kay sila manunukob nga mga lobo.

Kung kamo sa gihapon anaa pa sa bisan unsang pagduhaduha mahitungod niini hangyao ang Dios nga pinaagi sa Iyang Espiritu pun-on kamo ug giyahan kamo, **TUNGOD KAY ANG PINILI GAYUD DILI MALIMBONGAN.** Inyo bang nakuha kana? Wala'y si bisan kinsang tawo ang makalimbong kaninyo. Dili makalimbong si Pablo sa bisan kinsang pinili, kung siya man nasayup. Ug sa niadtong nahaunang Kapanahunan sa Efeso dili malimbongan ang mga pinili didto kay ilang gipang-usisa ang mini nga mga apostoles ug mga propeta ug nasuta silang mga bakakon ug gipangpahawa sila. Aleluya. Ang **IYANG** mga karnero nagapatalinghug sa Iyang tingog ug nagasunod sila **KANIYA.** Amen. Ginatoohan ko kini.



### ANG HALIGI NGA KALAYO

Ang maong Haligi nga Kalayo diha sa ibabaw sa ulo ni Igsoong Branham nakudakan didto sa Houston, Texas, niadtong Enero sa tuig 1950, ug giubanan siya sukad pa sa iyang pagkatawo niadtong tuig 1909. Panahon sa 1933 diha sa usa ka buluhaton sa pagpangbautismo didto sa suba sa Ohio sa Jeffersonville, Indiana, kining supernatural nga Pagka-Persona mitungha sa atubangan sa ginatus ka mga tawo, nga nagaingon kaniya, “Maingon nga si Juan Bautista nag-una sa unang pag-anhi ni Cristo, ikaw mao ang mag-una sa Iyang Ikaduhang Pag-anhi.”

Kini nga Mensahe ni Igsoong William Marrion Branham, *Ang Mensahero* ug *Ang Katapusang Paggasidaan Sa Espiritu*, gikuha gikan sa kapitulong Kapanahunan sa Iglesia sa Laodicea sa iyang basahon nga giulohan *Ang Kabatbatan sa Pito Ka Mga Kapanahunan sa Iglesia*, ug gipatik nga walay pagkausab ug gipang-apod-apod *nga walay bayad* sa Voice of God Recordings.

CEBUANO

©2010 VGR, ALL RIGHTS RESERVED

Ang mga kinutlo diha sa luyo nga tabon gipanguha gikan sa sulod niining basahona.

Ang orihinal nga mga Mensahe ni Igsoong William Marrion Branham girekord diha sa mga magnetikong teyp, nga may sobra sa 1100 nga mahimong makuha, ug nga gipadaghan nga walay pag-usab. Kadaghanan niining mga sermon anaa sa mga pormang basahon, gipatik nga walay pagkausab ug gipang-apod-apod *nga walay bayad.* Ang maong mga teyp, mga basahon, mga film, mga litrato, ug uban pang makatabang nga mga kasayuran mahitungod sa iyang pang-tibuok kalibutan nga bulohaton mamahimong maangkon pinaagi sa pagsulat:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

# Ang Katapusang Pagpasidaan Sa Espiritu

Pinadayag 3:22, “Siya nga may igdulogog, magpatalinghug siya sa ginasulti sa Espiritu ngadto sa mga iglesia.”

Kini mao ang KATAPUSANG pasidaan. Wala nay lain pang uban. Nahiandam na ang maong lawak sa trono. Ang napulo’g duha ka patukoranan napahiluna na. Ang mga dalan nga bulawan gilatang na. Ang mga ganghaan nga hinimo sa higantehong mga mutya giisa ug gibisagrahan na. Sama sa usa ka piramide nagabarog siya sa katahum kaayo ug mahimayaon. Ang mga langitnong binuhat nga maoy nag-andam kaniya nahingangha nga nagabantay, tungod kay siya nagakidlap-kidlap ug nagasidlak diha sa himaya nga dili yutan-on. Ang matag dagway sa iyang katahum nagasulti sa usa ka sugilanon mahitungod sa kahibulongang grasya ug gugma ni Jesus. Siya mao inandam nga ciudad alang sa mga inandam nga katawhan. Nagapaabot na lamang siya sa iyang mga lumolupyo, ug sa dili madugay tapukan na nila ang iyang mga dalan uban sa kalipay. Oo, kini na ang maong katapusang pagtawag. *Ang Espiritu dili na magasulti diha sa usa pa ka kapanahunan.* Human na ang mga kapanahunan.

Apan salamat sa Dios, sa pagkakaran, dili pa human kining maong kapanahunan. Nagapanawag pa kini gihapon. Ug ang Iyang pagtawag dili lamang diha sa espirituhanong mga dalunggan sa mga tawo pinaagi sa Iyang Espiritu, apan sa makausa pa anaa na sa yuta ang usa ka propeta. Sa makausa pa igapahayag sa Dios ang kamatuoran sama sa Iyang gibuhat ngadto kang Pablo. Sa mga adlaw sa ikapito nga mensahero, sa mga adlaw sa Kapanahunan sa Laodicea, igapahayag sa mensahero niini ang mga tinago sa Dios ingon sa pagkakahayag kang Pablo. Magasulti siya, ug kadtong mga nagadawat nianang propeta sa kaugalingong ngalan niini magadawat sa kaayohang epekto nianang ministerio sa maong propeta. Ug silang nagapatalinghug kaniya pagapanalanginan ug mamahimong kabahin nianang maong pangasaw-onon sa ulahing adlaw nga gihisgutan sa Pinadayag 22:17, “Ang Espiritu ug ang pangasaw-onon nagaingon umari ka.” Ang lugas sa Trigo (ang Pangasaw-onong Trigo) nga nahulog sa yuta sa Nicaea mibalik na ngadto sa orihinal nga Lugas nga Pulong pag-usab. Dalaygon ang Dios hangtud sa kahangturan. Oo, patalinghugi ang gipamatud-ang propeta sa Dios nga nagatungaha niining katapusang panahon. Kung unsa man ang iyang ginasulti gikan sa Dios, mao man usab ang igasulti sa pangasaw-onon. Ang Espiritu ug ang propeta ug ang pangasaw-onon magapanulti sa managsamang butang. Ug kung unsa man ang ilang igasulti mamahimong nasulti na diha sa Pulong. Ilang ginasulti kini karon. “Gumula kamo gikan kaniya karon ug managpamulag kamo.” Ang pagtawag napahayag na. Ginapahayag na ang maong pagtawag. Unsa pa kadugay magapanawag ang tingog? Wala kita mahibalo, apan usa ka butang ang atong nahibalo-an, dili na kini madugay pa, tungod kay kini na ang katapusang kapanahunan.

Siya nga may igdulogog, magpatalinghug siya sa ginasulti sa Espiritu ngadto sa mga iglesia. Ang Espiritu nagsulti na. Ang nagasalop nga adlaw hapit nang nagakahanaw ngadto sa eternidad alang sa mga kapanahunan sa iglesia. Dayon matapos na kini tanan. Unya mamahimong ulahi na kaayo ang pagduol. Apan kung adunay hain man niining mga hinan-ay nakigtagbo ang Dios kaninyo pinaagi sa Iyang Espiritu, hinaut nga mismo karon mamalik na kamo Kaniya diha sa paghinulsol ug itugyan ang inyong kinabuhi ngadto Kaniya nga pinaagi sa Iyang Espiritu hatagan Niya kamo ug kinabuhing walay katapusan.

**“MAO KINI ANG GINAINGON SA GINOO”**

“ang tingog sa ikapito nga mensahero”

“usa ka mensahero-nga-propeta alang  
niining kapanahunan”

“ang gahum sa walay-pagkasayup”

“ang batong-panaklob nga ministeriong  
may kalambigitan sa pagka-propeta”

“propetang mensahero sa Pinadayag 10:7”

“ang mao ra gihapon sa Malaquias 4:5-6”

“gipanghimatud-an sa Dios”

“gipamatud-an pinaagi sa Espiritu”

“ang mag-uuna sa Iyang  
ikaduhang pag-anhi”

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)